



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ԴԱՇՏՊԱՆՈՒԹՅԱՆ ՀԱՆՁՆԱԺՈՂՈՎԻ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 840, (+374 60) 830 850

Էլ-փոստ՝ info@competition.am, վեբ կայք՝ <http://www.competition.am>

« 12 » 09 2023 թ.

No 003159

«ՈՍԿԵ ՍԵՐ» ՍԱՀՄԱՆԱՓԱԿ
ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ՏՆՕՐԵՆ
ՊԱՐՈՆ ՍԱՄՎԵԼ ՂԱՐԻԲՅԱՆԻՆ
(հապցե՝ ardenis_info@rambler.ru,
պատճենը՝ Շիրակի մարզ, գ. Աշոցք)

Հարգելի՛ պարոն Ղարիբյան,

Կից ուղարկվում է Մրցակցության պաշտպանության հանձնաժողովի (այսուհետ նաև՝ **Հանձնաժողով**) 2023 թվականի ապրիլի 11-ի ««Ոսկե Սեր» սահմանափակ պատասխանատվությամբ ընկերության վերաբերյալ թիվ ՀԳ-00271/23 վարույթը կասեցնելու մասին» թիվ 159-Ա որոշման պատճենը:


Միաժամանակ տեղեկացնում ենք, որ Հանձնաժողով փաստաթղթեր ներկայացնել և ստանալ, ինչպես նաև Հանձնաժողովի հետ հետագա ողջ հաղորդակցությունը կարող եք իրականացնել նաև առցանց՝ Հանձնաժողովի e-Compete էլեկտրոնային համակարգի (այսուհետ՝ Համակարգ) միջոցով, որի համար անհրաժեշտ է գրանցվել Համակարգում՝ մուտք գործելով Հանձնաժողովի պաշտոնական կայքի (www.competition.am) «Իմ էջը» բաժին, ընտրելով «Գրանցվել» հրամանը և լրացնելով անձի նույնականացման համար պահանջվող տվյալները:

Առդիր՝ «5» թերթ:

ՀԱՐԳԱՆՔՈՎ՝
ԺԱՄԱՆԱԿԱՎՈՐ ՓՈԽԱՐԻՆՈՂ

ԴԱՎԻԹ ՀՈՎՀԱՆՆԻՍՅԱՆ

Կապարող՝ Արեգ Հովհաննիսյան
Անբարեխիղճ մրցակցության վերահսկողության վարչություն
Հեռ. (+374 60) 830-840 (238)



**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ**

Ո Ր Ո Շ ՈՒ Մ

11 ապրիլի 2023 թվականի թիվ 159-Ա

**«ՈՍԿԵ ՍԵՐ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ
ՎԵՐԱԲԵՐՅԱԼ ԹԻՎ ՀԳ-00271/23 ՎԱՐՈՒՅԹԸ ԿԱՍԵՑՆԵԼՈՒ ՄԱՍԻՆ**

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2023 թվականի ապրիլի 11-ի նիստում, քննարկելով «Ոսկե Սեր» սահմանափակ պատասխանատվությամբ ընկերության (այսուհետ նաև՝ **Ընկերություն**) վերաբերյալ թիվ ՀԳ-00271/23 վարույթը կասեցնելու մասին հարցը,

Պ Ա Ր Զ Ե Ց

Հանձնաժողովի նախագահի 2022 թվականի դեկտեմբերի 16-ի «Հսկիչ գնում իրականացնելու մասին» թիվ 278-Ա հրամանի հիման վրա 2022 թվականի դեկտեմբերի 19-ին «Պար-Արտ» սահմանափակ պատասխանատվությամբ ընկերությունում իրականացվել է հսկիչ գնում (այսուհետ նաև՝ **Հսկիչ գնում**), որի արդյունքում կազմվել է «Հսկիչ գնման արդյունքների վերաբերյալ» թիվ 278 արձանագրությունը:

Հսկիչ գնման արդյունքում, ի թիվս այլնի, ձեռք է բերվել «Ոսկե Սեր» սահմանափակ պատասխանատվությամբ ընկերության (այսուհետ նաև՝ **Ընկերություն**) կողմից 2022 թվականի նոյեմբերի 9-ին արտադրված «Շիրակ» ապրանքային նշանով, «Լոռի Excluzive» անվանումով, 50% յուղայնությամբ ապրանքը, որի փաթեթվածքի վրա առկա է հետևյալ մակնշումը. ««Շիրակ», «Լոռի Excluzive», «09 NOV 2022», «պատրաստված է անարատ կաթից», «յուղայնությունը 50%», Բաղադրությունը՝ կովի անարատ պաստերիզացված կաթ 100%, կերակրի աղ, կալցիումի քլորիդ, բնական ներկանյութ աննատո (E160b), բակտերիալ կուլտուրա, շրդանաֆերմենտ, էներգետիկ արժեքը 100գ.-ում՝ 331կկալ/1385կՋ, Սննդային արժեքը 100 գ.-ում՝ ճարպեր 28գ., սպիտակուցներ 22գ., աղ 3.5-4.5գ.: Պահպանման ժամկետը +2°C +5°C ջերմաստիճանում 6 ամիս, Արտադրող «Ոսկե Սեր» ՍՊԸ, ՀՀ, Շիրակի մարզ, գ. Աշոցք: Հեռ. 091-49-63-33» (այսուհետ նաև՝ **Ապրանք**):

Հանձնաժողովի գլխավոր քարտուղարի՝ 2022 թվականի դեկտեմբերի 20-ի «Փորձաքննություն իրականացնելու մասին» թիվ 309-Ա հրամանի հիման վրա, ի թիվս այլ

ապրանքների, Ապրանքն ուղարկվել է «Հանրապետական անասնաբուժասանիտարական և բուսասանիտարական լաբորատոր ծառայությունների կենտրոն» պետական ոչ առևտրային կազմակերպությանը (այսուհետ նաև՝ **ՊՈԱԿ**) լաբորատոր փորձաքննության՝ Ապրանքում բուսական յուղի առկայությունը և յուղայնության չափը պարզելու նպատակով:

ՊՈԱԿ-ը 2023 թվականի հունվարի 13-ին Հանձնաժողով է ներկայացրել 2023 թվականի հունվարի 13-ի թիվ 2148 փորձարկման արձանագրությունը, որի համաձայն՝ Ապրանքը պարունակում է բուսական յուղ և Եվրասիական տնտեսական հանձնաժողովի խորհրդի 2013 թվականի հոկտեմբերի 9-ի թիվ 67 որոշմամբ ընդունված «Կաթի և կաթնամթերքի անվտանգության մասին» Մաքսային միության տեխնիկական կանոնակարգի (ՄՄ ՏԿ 033/2013) (այսուհետ նաև՝ **Կանոնակարգ**) իմաստով չի հանդիսանում «պանիր»:

Հանձնաժողովի 2023 թվականի փետրվարի 1-ի ««Ոսկե Սեր» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 48-Ա որոշմամբ հարուցվել է թիվ ՀԳ-00271/23 վարույթը (այսուհետ նաև՝ **Վարույթ**):

Վարույթը հարուցվել է Ընկերության կողմից բուսական յուղի առկայությամբ Ապրանքի փաթեթվածքի մակնշվածքում դրա անվանումը «կաթնային ճարպի փոխարինիչով կաթ պարունակող մթերք՝ արտադրված (պատրաստված) պանրի տեխնոլոգիայով» չնշելով և «Պարունակում է բուսական յուղեր» տեղեկատվությունը չնշելով Ապրանքը իրացնելու միջոցով հասարակության մոլորեցման դրսևորմամբ անբարեխիղճ մրցակցության առերևույթ առկայության հիմքով:

Վարույթի շրջանակներում Ընկերությունը հայտնել է, որ Վարույթի հետ Ընկերությունն առնչություն չունի, քանի որ «Պար-Արտ» սահմանափակ պատասխանատվությամբ ընկերությանը Ընկերությունից վերջին մատակարարումը կատարվել է 2021 թվականի հունիսի 10-ին:

Ընկերությունը հայտնել է նաև, որ «Պար-Արտ» սահմանափակ պատասխանատվությամբ ընկերությունից հսկիչ գնմամբ ձեռքբերված «Լոռի» ապրանքատեսակը չի համարվում Ընկերության արտադրանք:

Քանի որ Ընկերությունը նախկինում համագործակցել է ԱԶ Ա. Հակոբյանի հետ, Ընկերությունը կապ է հաստատել վերջինիս հետ և պարզել, որ տվյալ ապրանքն իրենց կողմից մատակարարվել «Պար-Արտ» սահմանափակ պատասխանատվությամբ ընկերությանը:

Ընկերությունը նշել է, որ վերջինիս պատկանող պիտակը տվյալ ապրանքի վրա հայտնվելու փաստը Հանձնաժողովը կարող է պարզել ԱԶ Ա. Հակոբյանից:

Հանձնաժողովի նախագահի 2023 թվականի փետրվարի 28-ի թիվ 001785 գրությամբ «Պար-Արտ» սահմանափակ պատասխանատվությամբ ընկերությունից պահանջվել է Հանձնաժողով ներկայացնել Հսկիչ գնմամբ ձեռքբերված Ապրանքի ձեռքբերումը հիմնավորող փաստաթղթերի պատճենները:

«Պար-Արտ» սահմանափակ պատասխանատվությամբ ընկերությունը 2023 թվականի մարտի 6-ին ներկայացրել է պահանջված տեղեկատվությունը, որի համաձայն՝ ԱԶ Ա. Հակոբյանը 2022 թվականի նոյեմբերի 15-ին (հարկային հաշիվ թիվ Ա6034568749),

2022 թվականի դեկտեմբերի 6-ին (հարկային հաշիվ թիվ Ա7010701438) և (հարկային հաշիվ թիվ Ա9379965544), 2022 թվականի դեկտեմբերի 15-ին (հարկային հաշիվ թիվ Ա1569034218) «Պար-Արտ» սահմանափակ պատասխանատվությամբ ընկերությանը մատակարարել է ընդհանուր 321.1 կիլոգրամ «Լոռի Էքսկլյուզիվ» անվանումով պանիր:

Հանձնաժողովի նախագահի 2023 թվականի մարտի 13-ի թիվ 001850 գրությամբ ԱՁ Ա. Հակոբյանից պահանջվել է Հանձնաժողով ներկայացնել հետևյալ տեղեկատվությունը.

1. ԱՁ Ա. Հակոբյանի կողմից ե՞րբվանից է «Պար-Արտ» սահմանափակ պատասխանատվությամբ ընկերությանը իրացվում Ապրանքը, այլ տնտեսավարող սուբյեկտներին Ապրանքն իրացվելու դեպքում՝ նշել դրանց անվանումները և յուրաքանչյուր մատակարարման սկզբնաժամկետները,

2. Ու՞մ կողմից է արտադրվում (անվանումը և ՀՎՀՀ-ն) և որտե՞ղ է արտադրվում (արտադրամասի հասցեն) Ապրանքը՝ կցելով հիմնավորող փաստաթղթերի պատճենները,

3. ԱՁ Ա. Հակոբյանի կողմից Ապրանքի ձեռքբերումը հիմնավորող փաստաթղթերի պատճենները,

4. Ընկերության և ԱՁ Ա. Հակոբյանի միջև կնքված բոլոր փաստաթղթերի (պայմանագրեր, այդ թվում՝ աշխատանքային պայմանագրեր, դրանց փոփոխություններ, հաշիվ-ապրանքագրեր, հանձնման-ընդունման ակտեր և այլն) պատճենները:

ԱՁ Ա. Հակոբյանը 2023 թվականի մարտի 22-ին Հանձնաժողով է ներկայացրել գրություն՝ հայտնելով, որ Ապրանքն արտադրվում է «Իգիթ» սահմանափակ պատասխանատվությամբ ընկերության կողմից (իրավաբանական հասցե՝ ՀՀ, Շիրակի մարզ, գ. Ազատան, 54/6, ՀՎՀՀ 05801607):

ԱՁ Ա. Հակոբյանը հայտնել է նաև, որ 2017 թվականի հոկտեմբերի 17-ից մինչև 2018 թվականի հունվարի 26-ն ընկած ժամանակահատվածում Ընկերությունում աշխատել է որպես առաքիչ՝ կցելով համապատասխան փաստաթղթերի պատճենները:

ԱՁ Ա. Հակոբյանը որպես Ապրանքի ձեռքբերում ներկայացրել է 2022 թվականի նոյեմբերի 22-ի թիվ Ա2740687723 հարկային հաշիվը, որի համաձայն՝ ԱՁ Ա. Հակոբյանը «Իգիթ» սահմանափակ պատասխանատվությամբ ընկերությունից ձեռք է բերել 150 կիլոգրամ «Չանախ 50% յուղ» անվանումով պանրային արտադրանք:

Միաժամանակ, ԱՁ Ա. Հակոբյանը հայտնել է, որ Ընկերությունում ավարտելով աշխատանքը՝ սկսել է իրականացնել ձեռնարկատիրական գործունեություն, այդ թվում՝ պանրի վերավաճառք: Բացի այդ, ԱՁ Ա. Հակոբյանը նշել է, որ Ընկերությունում աշխատանքն ավարտելուց հետո իր մոտ մնացել է Ընկերությանը պատկանող «Լոռի Excluzive» անվանումով պիտակներ:

ԱՁ Ա. Հակոբյանը հայտնել է, որ ձեռքբերելով «Իգիթ» սահմանափակ պատասխանատվությամբ ընկերությունից «Չանախ 50% յուղ» անվանումով պանրային արտադրանքը սխալմամբ տվյալ ապրանքի վրա փակցրել է «Լոռի Excluzive» անվանումով պիտակը և մատակարարել «Պար-Արտ» սահմանափակ պատասխանատվությամբ ընկերությանը:

Հաշվի առնելով վերոգրյալը և այն հանգամանքը, որ սխալմամբ փակցված պիտակներով ապրանքները հնարավոր չէ նույնականացնել՝ ԱՁ Ա. Հակոբյանը նշել է, որ

չի կարող տալ տեղեկատվություն առ այն, թե տվյալ ապրանքները որ տնտեսավարող սուբյեկտներին է մատակարարվել:

Միաժամանակ, ԱԶ Ա. Հակոբյանը հայտնել է, որ 2022 թվականի օգոստոսի 3-ից համագործակցում է «Կայգեր», 2021 թվականի մարտի 22-ից «Երևան Սիթի», 2022 թվականի հուլիսի 13-ից «Նոր Զովք» և 2021 թվականի ապրիլի 2-ից «Տիտան» սուպերմարկետների հետ:

Հանձնաժողովը 2023 թվականի ապրիլի 4-ի թիվ 146-Ա որոշմամբ հարուցել է թիվ ՀԳ-01305 վարույթը (այսուհետ նաև՝ **թիվ ՀԳ-01305 վարույթ**)՝ ԱԶ Ա. Հակոբյանի կողմից հասարակության մոլորեցման դրսևորմամբ անբարեխիղճ մրցակցության հատկանիշների առերևույթ առկայության հիմքով:

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 65-րդ հոդվածի 1-ին մասի 2-րդ կետի համաձայն՝ Հանձնաժողովի կողմից իրականացվող վարույթը կասեցվում է, եթե՝

(...)

2) անհնարին է տվյալ վարույթի արդյունքում որոշման ընդունումը մինչև այլ վարչական վարույթով որոշում կայացնելը.

(...)

4) առկա են օրենքով նախատեսված այլ հիմքեր:

Վկայակոչված դրույթներից հետևում է, որ վարույթը կասեցնելու Հանձնաժողովի պարտականությունը ծագում է հետևյալ պայմանների միաժամանակյա առկայության դեպքում.

1. այլ վարչական վարույթի առկայություն.

2. տվյալ վարչական վարույթի արդյունքում ակնկալվող վարչական ակտի ընդունման անհնարինություն:

Վերոնշյալ համատեքստում Հանձնաժողովը հարկ է համարում անդրադառնալ վարույթի արդյունքում ակնկալվող վարչական ակտի ընդունման անհնարինության պայմանի բովանդակության բացահայտմանը:

Այս կապակցությամբ Հանձնաժողովն արձանագրում է, որ «վարչական ակտի ընդունման անհնարինություն» եզրույթը ենթադրում է ոչ թե վարչական ակտի ընդունման գործնական հնարավորության բացակայություն, այլ գործի բազմակողմանի, լրիվ և օբյեկտիվ քննության պահանջների պահպանմամբ վարչական ակտի ընդունման իրավական խոչընդոտների առկայություն: Մասնավորապես վարույթի արդյունքում ակնկալվող վարչական ակտի ընդունման անհնարինությունը ենթադրում է Հանձնաժողովի կողմից իրականացվող վարույթի և այլ վարչական վարույթի այնպիսի փոխկապվածություն, որի առկայության պայմաններում Հանձնաժողովի կողմից վարույթի իրականացումը հնարավոր չէ մինչև տվյալ գործի համար պարտադիր նշանակություն ունեցող հարցի կարգավորումը այլ վարչական վարույթի շրջանակներում:

Համապատասխան վարույթը եզրափակող ակտի ընդունման անհնարինության պայմանի վերաբերյալ այլ, սակայն համարժեք ինստիտուտների շրջանակում ևս տրվել է նույնաբովանդակ մեկնաբանություններ: Մասնավորապես՝ Վճռաբեկ դատարանը մի շարք որոշումներով նշել է, որ դատական գործի քննության անհնարինությունը, որպես

դատական գործի վարույթը կասեցնելու պարտադիր հիմք կարող է իրավաչափ համարվել միայն այն դեպքում, երբ սահմանադրական, քաղաքացիական, քրեական կամ վարչական դատավարության կարգով քննվող այլ գործի շրջանակներում կայացվելիք վերջնական դատական ակտով պետք է հաստատվեն այնպիսի իրավաբանական փաստեր, կամ պետք է հանգուցալուծվեն այնպիսի իրավական հարցեր, առանց որոնց դատարանի վարույթում գտնվող գործի լուծումը հնարավոր չէ, իսկ այդ հարցերի քննարկումը և դրանց վերաբերյալ գնահատականներ տալը դուրս է տվյալ գործով դատարանի իրավասության շրջանակներից (տե՛ս, թիվ ՎԴ/0100/05/17 և ՎԴ/2451/05/18 վարչական գործերով Վճռաբեկ դատարանի որոշումները):

Հաշվի առնելով վերոգրյալը՝ Հանձնաժողովը գտնում է, որ առկա է Վարույթի կասեցման հիմք, քանի որ թիվ ՀԳ-01305 վարույթով, ի թիվս այլնի, պարզման ենթակա է ԱԶ Ա. Հակոբյանի կողմից Ընկերության անվանումը մականշելու հարցը, որը էական է Վարույթի համար:

Հիմք ընդունելով վերոգրյալը և ղեկավարվելով Օրենքի 38-րդ հոդվածի 1-ին, 2-րդ մասերով, 65-րդ հոդվածի 1-ին մասի 2-րդ կետով, 5-րդ մասով, 42-րդ հոդվածի 2-րդ մասով՝ Հանձնաժողովը

Ո Ր Ո Շ Ե Ց

1. Կասեցնել «Ոսկե Սեր» սահմանափակ պատասխանատվությամբ ընկերության վերաբերյալ թիվ ՀԳ-00271/23 վարույթը մինչև թիվ ՀԳ-01305 վարույթով եզրափակիչ որոշման կայացումը:

2. Սույն որոշումն ուժի մեջ է մտնում ընդունման պահից:

ՆԱԽԱԳԱՀ

2023 թ. ապրիլի 11
Երևան

Գ. ԳԵՎՈՐԳՅԱՆ

